

# Una Sulat I Juan

## Una Basan

Tô igsulat kani si Juan na sábbad katô sapulù duwa (12) disipulu i Jesu-Cristo na igpapid din ébô mulit-ulit katô kagi din. Tugál dán si Juan tô timpo na igsulat sikandin kani.

Ni una sulat din igpapid din tun ta mga ágpampamaké na ágginawaan din asta igsarigan katô Manama tun ta marapung ássa mga banuwa. Tô timpo tô, duwán mga manubù na ágtinurù katô ánnà bánnal. Duwán mga ágkagi na ánnà Batà katô Manama si Jesu-Cristo su manubù dád kun sikandin. Duwán mga duma na ágkagi na tô Batà ka Manama ándà pamanubù. Asta duwán pô gó mga ássa mga bulaló na igtinurù dan.

Kannun ta una sulat i Juan, matayyó na si Jesu-Cristo tô bánnal Batà ka Manama, asta igpamanubù gó sikandin.

Igtinuruan din tô mga ágpampamaké na kailangan imátmáttán dan ka duwán ágtinurù katô tullid ágtinuruán i Jesu-Cristo ébô liliyan dan tô ánnà bánnal ágtinuruán.

Tuu matayyó ni igsulat din na tô langun ágpamaké ki Jesu-Cristo asta ágginawa katô Manama, kailangan ginawaan dan tô mga unawa dan.

## Si Jesu-Cristo tô ágbággé ka kantayan

**1** <sup>1</sup>Igsulatta ákniyu tingód kandin na duwán dán taganà tô ándà pa imuwi ni banuwa. Sikandin gó tô igdinág dé, igkita dé, isállággan dé, asta igawidan dé. Sikandin tô ánggadanan na Kagi ka Manama na ágbággé ka kantayan na ándà ágtamanán. <sup>2</sup>Ni ágbággé ka kantayan tô igpakita ka Manama áknami, asta igkita dé sikandin. Sikami tô mga testigos na gulit-ulit ákniyu na sikandin tô manté ka ándà ágtamanán. Sikandin tô igduma katô Ámmà Manama asta igpakita sikandin áknami.

<sup>3</sup>Igulit-ulit dé ákniyu tô igkita dé asta tô igdinág dé ébô pasábbad kó áknami, su igpasábbad ké tun ta Ámmà Manama asta tun ta Batà din na si Jesu-Cristo. <sup>4</sup>Igsulat ké kani ákniyu ébô tuu ki gó kadayawan.

### Mga manubù na dutun ta kappawaan

<sup>5</sup>Ni gó tô igtinurù i Jesu-Cristo na igdinág dé, asta ni gó tô gulit-ulitán dé ákniyu. Tô Manama tô ágtikudan ka kadigárran iring na kappawaan, asta ándà palang madat tun kandin iring na kangittángngan. <sup>6</sup>Purisu atin ka kumagi ki na igpasábbad kid tun ta Manama, asal góddô ki pô tun ta kangittángngan, bulaló tô ágkagin ta, asta dì ki ágtuman katô kabánnalan. <sup>7</sup>Asal ka góddô ki tun ta kappawaan iring katô Manama na góddô tun ta kappawaan, duwán sinábbadan ta, asta tô dipanug ka kamaté i Jesus na Batà katô Manama tô áglinis áknita tikud tun ta langun salà ta.

<sup>8</sup>Atin ka kumagi ki na ándà salà ta, iglimbungan ta tô áknita sarili, asta ándà ki tuman katô kabánnalan. <sup>9</sup>Asal atin ka ulitán ta tun ta Manama na bánnal iglumu ki ka salà, pasinsiyaan din tô mga salà ta asta linisan ki ikandin tikud tun ta langun ka madat mga lumu ta, su ágkasarigan sikandin asta nángngà tô áglumun din. <sup>10</sup>Atin ka kumagi ki na ándà ki ikasalà, magunawa dád ka kumagi ki na ágbulaló tô Manama, asta ándà ta tanggapi tô kagi din.

**2** <sup>1</sup>Igsulatan ku sikiyu na mga gabatà ku ébô dì kó lumumu ka salà. Asal atin ka duwán tun ákniyu na makalumu ka salà, duwán pédu-édu tun ta Ámmà para áknita. Sikandin si Jesu-Cristo na ándà gó salà. <sup>2</sup>Sikandin tô igpamaté na bullas áknita ébô pasinsiyaan tô mga salà ta. Ánnà dád áknita mga salà tô mému pasinsiyaan din, asal tô mga salà katô langun manubù nit banuwa.

<sup>3</sup>Ukit katô pagtuman ta katô mga sugù ka Manama, kasóddóran ta na bánnal igpasábbad kid tun kandin. <sup>4</sup>Atin ka ágkagi tô manubù na igpasábbad sikandin tun ta Manama, asal dì sikandin ágtuman katô mga sugù ka Manama, bulalón sikandin, asta ándà din tanggapi tô kabánnalan. <sup>5</sup>Asal tô manubù na ágtuman katô kagi ka Manama, ágginawa sikandin ka Manama iring katô kaginawa ka Manama kandin. Ukit kani kasóddóran ta na igpasábbad kid tun ta Manama. <sup>6</sup>Tô manubù na ágkagi na igpasábbad sikandin tun ta Manama, kailangan tô ágkémun din iring katô ágkémun i Jesu-Cristo.

### Tô mantu sugù

<sup>7</sup>Mga ágginawaan ku, ánnà mantu ni sugù na igsulat ku ákniyu na kailangan paginawaé kó.<sup>a</sup> Asal tô igpamaké kó, ni gó tô taganá ig sugù

<sup>a</sup> 2:7 Ahaán tô Juan 13:34

ákniyu. Ni gó tó sugù na igpasóddór ákniyu tikud pô tun ta kapamaké yu. <sup>8</sup>Asal iring na mantu ni sugù na igsulat ku ákniyu su igpakita i Cristo tó bálnal ginawa din ukit katô iglumu din, asta sikiyu pagsik tó ágpakita katô ginawa yu ukit katô áglumun yu. Su ukit katô katanan yu katô madat mga linumuwan, iring na inandà dán tó kangittángngan, asta ukit katô kalumu yu katô nángngà tun ta saruwan ka Manama, iring na ágséllà dán tó kappawaan katô Manama.

<sup>9</sup>Atin ka ágkagi tó manubù na dutun sikandin ta kappawaan, asal ágkaringasa katô kataladi din, dutun pô sikandin ta kangittángngan. <sup>10</sup>Asal atin ka ágginawa tó manubù katô kataladi din, dutun sikandin ta kappawaan, asta ándà dán mému gunayan na makasalà sikandin. <sup>11</sup>Asal atin ka ágkaringasa tó manubù katô kataladi din, dutun pô sikandin ta kangittángngan. Ágpanó sikandin tun ta kangittángngan, asta ándà din kasóddóri ka ánda tó sadunan din, su di pakakita guné katô kangittángngan.

<sup>12</sup>Igsulatta ákniyu na mga gabatà su igpasinsiyaan dán ka Manama tó mga salà yu ukit katô iglumu i Jesu-Cristo. <sup>13</sup>Igsulatta ákniyu na mga ámmà su ikasóddór kód ki Jesu-Cristo na duwán dán taganà tikud pô tun ta tigkanayan ka langun. Igsulatta ákniyu na mga sumuddù gamama, su igpanalu kó ki Maibuyan.

<sup>14</sup>Igsulatta ákniyu na mga gabatà su isóddóran yud tó Ámmà Manama. Igsulatta ákniyu na mga ámmà su isóddóran yud si Jesu-Cristo na duwán dán taganà tikud pô tun ta tigkanayan. Igsulatta ákniyu na mga sumuddù gamama su masarig tó ákniyu kapamaké, asta inalayun ágbálnal kó katô kagi ka Manama, asta igpanalu kód ki Maibuyan.

<sup>15</sup>Yakó yu ágginawayi tó madat ágkémun katô mga manubù na di ágpamaké, asta yakó yu ágginawayi tó madat mga kakalyag katô duma mga manubù nit banuwa. Atin ka ágginawaan yu tó madat ágkémun nit banuwa, ándà ginawa yu katô Ámmà Manama, <sup>16</sup>su tó langun ka ágkémun nit banuwa, yan tó kébág ka mga manubù ukit katô lawa, ukit katô kasállág, asta ukit katô kapadadurung. Ni mga ágkémun ánnà tikud tun ta Ámmà Manama, asal tikud dád nit banuwa. <sup>17</sup>Duwán ágtamanán katô mga manubù na di ágpamaké asta katô madat mga ágkadigárran dan nit banuwa, asal tó ágtuman katô kakalyag ka Manama manté sippang ka ándà ágtamanán.

### Tô usig i Cristo

<sup>18</sup>Mga gabatà ku, masig dán dumunggù tó katapuriyan mga álló. Ikadinág kód na dumunggù tó usig i Cristo, asta bálnal na igdunggù dán gó tó marapung mga usig i Cristo. Purisu isóddóran tad na masig dán dumunggù tó katapuriyan mga álló. <sup>19</sup>Agad ni mga usig ta igtanan áknita dángngan, asal ánnà dan bálnal mga kadumaan ta. Atin ka bálnal dan

na mga kadumaan ta, igpanayun dan pád igduma áknita. Asal igtanan dan ébô kasóddóran ta na ánnà dan bánnal mga kadumaan ta.

<sup>20</sup>Asal sikiyu, ánnà kó iring kandan su igpasunnadan kód i Jesu-Cristo katô Ugis Espiritu. Purisu ikasóddór tô langun yu katô kabánnalan.

<sup>21</sup>Ágsulatan ku sikiyu ánnà su ándà sóddór yu katô kabánnalan, asal su ikasóddór kó katô kabánnalan, asta ikasóddór kó na ándà bulaló na ágtikud tun ta kabánnalan.

<sup>22</sup>Na, ágkagi tô mga bulalón na ánnà Mesiyas<sup>b</sup> si Jesus. Tô gó tô mga usig i Cristo, su géllé dan katô Ámmà Manama asta katô Batà din na si Jesus. <sup>23</sup>Tô géllé katô Batà ka Manama, ándà sikandin pasábbad tun ta Ámmà Manama, asal tô gulit na igpasábbad sikandin tun ta Batà ka Manama, igpasábbad pagsik sikandin tun ta Ámmà.

<sup>24</sup>Purisu kailangan tumanán yu tô kabánnalan na igtinurù ákniyu tikud pô tun ta kapamaké yu. Atin ka tumanán yu tô igtinurù ákniyu, ágpasábbad kó tun ta Batà asta tun ta Ámmà. <sup>25</sup>Igtandô katô Manama na duwán bággen din áknita, asta tô gó tô kantayan na ándà ágtamanán.

<sup>26</sup>Igsulatta ákniyu ébô kasóddóran yu tô tingód katô mga manubù na malyag lumimbang ákniyu. <sup>27</sup>Asal sikiyu, góddóan kó katô Ugis Espiritu na igtanggap yu tikud tun ki Jesu-Cristo. Purisu di dán kailangan na tinuruan kó katô duma manubù, su tô Ugis Espiritu tô ágtinurù ákniyu katô langun. Bánnal tô ágtinuruán din, asta ánnà bulaló. Purisu panayun kó ágtuman katô igtinurù katô Ugis Espiritu ákniyu.

<sup>28</sup>Na, mga gabatà ku, pasábbad kó tun ki Jesu-Cristo ébô di ki kamáddangan asta di ki kayyaan tun ta saruwan i Cristo tun ta kalónód din. <sup>29</sup>Isóddóran yu na nángngà tô áglumun ka Manama. Purisu kailangan kasóddóran yu na atin áglumu tô langun manubù katô nángngà tun ta saruwan ka Manama, igimu dan ikandin na mga gabatà din.

### Mga gabatà katô Manama

**3** <sup>1</sup>Panámdám kó tingód katô dakál ginawa ka Ámmà Manama na igpakita din áknita, su igtawar ki ikandin na mga gabatà din. Sikita gó tô mga gabatà din. Purisu tô mga manubù nit banuwa na di ágpamaké ándà ikasóddór na sikita tô mga gabatà ka Manama su ándà dan kasóddóri ka sadan tô Manama. <sup>2</sup>Mga ágginawaan ku, agad mga gabatà kid katô Manama áknganni, ándà pa pasóddóri ka Manama áknita ka ándin tô kéringan ta tun ta katapuriyan álló. Asal isóddóran ta na ka pakita dán si Cristo, makéring ki kandin, su kitanán ta sikandin na magunawa gó katô bónnóng din áknganni tun ta langit. <sup>3</sup>Purisu tô

<sup>b</sup> 2:22 Mesiyas tô kagi ka Hebreo na magunawa katô kagi ka Griego “Cristo.” Tô kóbadan kani, “tô isalin ka Manama.” Si Jesu-Cristo tô ánggadanan na Mesiyas.

manubù na giman na makéring sikandin ki Cristo, inalayun áglili ka salà, iring ki Cristo na ándà salà.

<sup>4</sup>Asal tō áglumu ka salà, tō gó tō ruudan su iglapas katō sugù ka Manama, su salà tō áglapas katō sugù ka Manama. <sup>5</sup>Isóddóran yu na igpamanubù si Jesu-Cristo ébô miwà katō mga gunayan ka salà, asta ándà gó sikandin ikasalà. <sup>6</sup>Purisu tō manubù na igpasábbad tun kandin dì dán manayun áglumu ka salà. Asal tō mga manubù na ágpanayun áglumu ka salà ándà pa gó ikagpát ka sadan si Cristo, asta ándà ikasóddór kandin.

<sup>7</sup>Purisu mga gabatà ku, yakó áglimbung katō ákniyu sarili! Atin ka ágpanayun tō manubù áglumu katō nángngà, kasóddóran na nángngà sikandin tun ta saruwan ka Manama, iring ki Cristo na nángngà.

<sup>8</sup>Asal atin ka ágpanayun tō manubù áglumu ka salà, sakup sikandin i Maibuyan, su si Maibuyan áglumu ka salà tikud pô tun ta katigkanayan. Purisu igpamanubù tō Batà ka Manama ébô dadattan tō mga áglumun i Maibuyan.

<sup>9</sup>Atin ka inému dán tō manubù na batà ka Manama, dì dán sikandin manayun áglumu ka salà, su dutun dán kandin tō ágkémun ka Manama. Dì dán sikandin makapanayun áglumu ka salà su inému dán sikandin na batà ka Manama. <sup>10</sup>Ukit kani, kilalan ta ka sadan tō mga gabatà ka Manama asta ka sadan tō mga gabatà i Maibuyan. Ánnà batà katō Manama tō manubù na di áglumu katō nángngà asta di ágginawa katō kataladi din.

### Kailangan paginawaé ki

<sup>11</sup>Kailangan paginawaé ki, su ni gó tō igtinurù na igdinág yu tikud pô tun ta kapamaké yu. <sup>12</sup>Dì mému ka miring ki ki Cain na sakup i Maibuyan. Igmatayan i Cain tō kataladi din su madat tō mga linumuwan i Cain, asta nángngà tō mga linumuwan katō kataladi din tun ta saruwan ka Manama.<sup>c</sup>

<sup>13</sup>Purisu mga kataladi, yakó ágkasalábbuan ka ágkaringasaan kó katō mga manubù nit banuwa. <sup>14</sup>Na, isóddóran ta na igtikud kid tun ta kamatayan<sup>d</sup> asta dutun kid ta mantu kantayan, su ágginawaan ta tō mga kataladi ta. Tō manubù na di ágginawa dutun pô ta kamatayan. <sup>15</sup>Tō manubù na ágkaringasa katō kataladi din, iring sikandin katō taramaté. Isóddóran yu na ándà taramaté na ágbággayan ka Manama katō kantayan na ándà ágtamanán. <sup>16</sup>Kasóddóran ta ka ándin tō bálnal ginawa su igpamaté si Cristo na bullas para áknita. Purisu kailangan makataganà ki

---

<sup>c</sup> 3:12 Ahaán tō Genesis 4:1-25    <sup>d</sup> 3:14 Tō kóbadan kani kamatayan, tō gó é ágkémun ka manubù na di ágpamaké ki Jesu-Cristo, su katamanan din tō supak ka Manama na ándà ágtamanán.

pamaté na bullas para katô mga kataladi ta. <sup>17</sup>Atin ka madigár é kóddô ta, asta kitanán ta na ágkahirapan tô kataladi ta, asal ka di ki ágkédúwan kandin, di ki ágginawa katô Manama. <sup>18</sup>Mga gabatà, di nángngà ka kumagi ki dád na ágginawa ki katô mga kataladi ta, asal kailangan pakitanán ta na bálnal tô kaginawa ta kandan ukit katô mga áglumun ta.

<sup>19</sup>Na, ukit katô kaginawa ta, kasóddóran ta na ágbálnalán ta tô kabálnalan na ágtinuruán, asta pasunayán ta tô pusung ta tun ta saruwan ka Manama. <sup>20</sup>Agad ágpanámdám ki na duwán kayyà ta, asal tuu pa dakál tô isóddóran katô Manama ka tandingán katô isóddóran ta, su isóddóran din gó tô langun-langun. <sup>21</sup>Mga ágginawaan ku, atin ka isóddóran ta na di ki kayyaan, ándà gó máddang ta ka tumubang ki katô Manama. <sup>22</sup>Purisu atin ka duwán pamuyuán ta kandin, matanggap ta, su ágtumanán ta tô mga sugù din asta áglumun ta tô makapadayó kandin. <sup>23</sup>Ni gó tô sugù din áknita na kailangan mamaké ki katô Batà din na si Jesu-Cristo, asta kailangan paginawaé ki iring katô igsugù din áknita. <sup>24</sup>Tô ágtuman katô mga sugù ka Manama igpasábbad dán tun ta Manama, asta tô Manama igpasábbad tun kandin. Ukit katô Ugis Espiritu na igbággé ka Manama áknita, isóddóran ta na igpasábbad tô Manama áknita.

#### Bálnal asta ánnà bálnal ágtinuruán

**4** <sup>1</sup>Mga ágginawaan, yakó sékót ágbálnal katô mga ágtinurù tingód katô Manama, asal kinnami yu tô ágtinuruán dan ébô kasóddóran yu ka tikud tun ta Manama ó ánnà. Su marapung tô ánnà bálnal mga propeta na ágtalap nit banuwa. <sup>2</sup>Ni gó tô kapókit ébô kasóddóran yu ka tikud tun ta Manama tô ágtinuruán, su tô ágtinurù na igpamanubù si Jesu-Cristo, tikud tun ta Manama tô ágtinuruán din. <sup>3</sup>Asal tô di ágtinurù na igpamanubù si Jesus, ánnà tikud tun ta Manama tô ágtinuruán din. Sikandin gó tô usig i Cristo. Ikadinág kód na dumunggù tô usig i Cristo, asta dini dán gó sikandin ta banuwa.

<sup>4</sup>Asal mga gabatà, sakup kó katô Manama, asta ándà kó kapid katô ánnà bálnal mga propeta, su tô Manama diyan ákniyu tuu pa matulus ka tandingán ki Maibuyan na ágpangulu katô mga manubù na di ágpamaké nit banuwa. <sup>5</sup>Ni ánnà bálnal mga propeta tô isakup tun ta mga di ágpamaké nit banuwa. Purisu tô ágkagin dan magunawa katô ágkagin katô mga di ágpamaké, asta ágpaminág kandan tô mga di ágpamaké. <sup>6</sup>Asal su sikami tô mga sakup ka Manama, ágpaminág áknami tô mga ikasóddór katô Manama, asal tô ánnà mga sakup ka Manama di ágpaminág áknami. Ukit kani, kasóddóran ta tô ágtinuruán na bálnal asta tô ágtinuruán na ánnà bálnal.

#### Ginawa tikud tun ta Manama

<sup>7</sup>Mga ágginawaan, kailangan paginawaé ki, su Manama tô ágtikudan ka ginawa, asta tô mga ágginawa katô kataladi dan, tô gó tô inému dán

mga gabatà katô Manama, asta ikasóddór dan katô Manama. <sup>8</sup>Asal tó dì ágginawa ándà ikasóddór katô Manama, su Manama tó ágginawa. <sup>9</sup>Igpakita katô Manama na ágginawa sikandin áknita ukit katô kapapid din katô bugtung Batà din kannun ta banuwa ébô bággayan ki katô kantayan na ándà ágtamanán ukit katô kamatayan din para áknita. <sup>10</sup>Ni gó tó ágpasóddór ka ándin tó bánnal ginawa. Ánnà sikita tó igginawa katô Manama, asal Manama tó igginawa áknita asta igppapid din tó Batà din na igmatayan ébô kapasinsiyaan ka Manama tó mga salà ta.

<sup>11</sup>Mga ágginawaan, su ni gó tó kaginawa katô Manama áknita, kailangan paginawaé ki. <sup>12</sup>Ándà gó manubù na ikakita katô Manama. Asal atin ka ágpaginawaé ki, igpasábbad tó Manama áknita, asta ukit kandin, ágginawa kid kandin.

<sup>13</sup>Ukit kani, makasóddór ki na igpasábbad ki tun ta Manama asta tó Manama igpasábbad áknita, su igbággé din dán áknita tó Espiritu din. <sup>14</sup>Igkita dé asta igulit dé na igppapid katô Ámmà Manama tó Batà din ébô imun sikandin na Taratábbus katô mga manubù nit banuwa. <sup>15</sup>Purisu atin ka gulit tó manubù na si Jesus tó Batà ka Manama, igpasábbad tó Manama tun kandin, asta igpasábbad sikandin tun ta Manama. <sup>16</sup>Ikasóddór ki asta igbánnal na ágginawaan ki katô Manama. Su Manama gó tó ágginawa, atin ágginawa tó manubù katô mga kataladi din, igpasábbad sikandin tun ta Manama asta igpasábbad tó Manama tun kandin. <sup>17</sup>Ukit katô ágkémun ta na iring katô ágkémun i Cristo nit banuwa, ágginawa ki iring katô kakalyag ka Manama, asta dì ki kamáddangan ka tumubang ki tun ta Manama tó álló ka rumuud sikandin. <sup>18</sup>Dì kamáddangan tó manubù na tuu ágginawa katô Manama, su atin ka ágginawa ki kandin, ándà gó máddang ta. Kamáddangan tó manubù na supakan, asta tó manubù na ágkamáddangan ka Manama dì tuu ágginawa katô Manama.

<sup>19</sup>Ágginawa ki su una tó Manama igginawa áknita. <sup>20</sup>Purisu ka kumagi tó manubù na ágginawa sikandin katô Manama, asal ágkaringasa katô kataladi din, bulalón sikandin. Atin ka dì sikandin ágginawa katô kataladi na igkita din, dì ágginawa katô Manama na ándà din kitayi. <sup>21</sup>Ni gó tó sugù katô Manama áknita. Atin ágginawa tó manubù katô Manama, kailangan guminawa pagsik sikandin katô kataladi din.

### Kapanaluwan ta katô madat nit banuwa

**5** <sup>1</sup>Tó mga manubù na ágbánnal na si Jesus tó Mesiyas, tó gó tó mga gabatà ka Manama, asta tó mga manubù na ágginawa katô Ámmà Manama, ágginawa dan pagsik katô mga gabatà ka Manama. <sup>2</sup>Atin ka tuu ki ágginawa katô Manama asta ágtuman ki katô mga sugù din, kasóddóran ta gó na ágginawa ki katô mga gabatà ka Manama. <sup>3</sup>Atin ka ágginawa ki katô Manama, ágtumanán ta tó mga sugù din,

asta di mahirap tô pagtuman ta katô mga sugù din. <sup>4</sup>Tô langun gabatà ka Manama makapanalu katô madat nit banuwa. Ukit katô kapamaké ta ikapanalu kid katô madat nit banuwa. <sup>5</sup>Tô manubù na ágbánnal na si Jesus tô Batà ka Manama, tô dád gó tô makapanalu katô madat nit banuwa.

### Tállu ágtestigos tingód ki Jesu-Cristo

<sup>6</sup>Si Jesu-Cristo tô igpamanubù, asta igpasóddór din na sikandin tô Batà ka Manama ukit katô wayig tun ta kabunyang kandin asta ukit katô dipanug tun ta kamatayan din. Igsadun sikandin dini ánnà dád ébô pabunyang, asal ébô maté sikandin. Bánnal tô ágtestigosán katô Ugis Espiritu, su sikandin gó tô ágtikudan ka kabánnalan. <sup>7</sup>Purisu duwán tállu na ágtestigos tingód ki Jesu-Cristo, <sup>8</sup>tô gó tô Ugis Espiritu, tô wayig tun ta kabunyang kandin, asta tô dipanug tun ta kamatayan din, asta ni tállu ni igpasábbadé. <sup>9</sup>Su ágbánnalán ta tô ágkagin katô mga manubù, asta tô igkagi ka Manama tuu pa ágkasarigan ka tandingán katô igkagi ka mga manubù, ágbánnalán ta gó tô igkagi ka Manama tingód ki Jesus na Batà din. <sup>10</sup>Purisu tô manubù na ágpamaké katô Batà ka Manama, ágbánnal sikandin katô igkagi ka Manama tingód katô Batà din. Asal tô manubù na di ágbánnal kani, magunawa dád ka kumagi sikandin na ágbulaló tô Manama, su ándà din bánnali tô igkagi katô Manama tingód katô Batà din. <sup>11</sup>Ni gó tô igkagi katô Manama. Igbággé ka Manama áknita tô kantayan na ándà ágtamanán, asta ni kantayan igbággé ukit katô kapasábbad ta tun ta Batà din. <sup>12</sup>Tô manubù na igpasábbad dán tun ta Batà ka Manama, duwán kantayan din na ándà ágtamanán. Asal tô manubù na ándà pasábbad tun ta Batà ka Manama, ándà kantayan din na ándà ágtamanán.

### Kantayan na ándà ágtamanán

<sup>13</sup>Igsulatta ákniyu na igpamaké katô Batà ka Manama ébô kasóddóran yu na duwán kantayan yu na ándà ágtamanán. <sup>14</sup>Ándà máddang ta na padani tun ta Manama. Purisu atin ka duwán pamuyuan ta na nángngà tun ta kakalyag din, maminág gó sikandin áknita. <sup>15</sup>Su isóddóran ta na ágpaminág tô Manama áknita, agad ándin tô pamuyuan ta kandin, kasóddóran ta gó na matanggap ta tô igpamuyù ta.

<sup>16</sup>Atin ka kitanán yu tô kataladi yu na áglumu ka salà na di makapid kandin tun ta kamatayan, dasal kó para kandin, asta bággén ka Manama tô kantayan tun ta ikému ka salà na di makapid tun ta kamatayan. Duwán gó lumumu ka salà na makapid tun ta kamatayan. Ándà a kagi na kailangan dumasal kó para katô manubù na áglumu ka salà iring kanan. <sup>17</sup>Salà tô langun na mga áglumun ta na ánnà nángngà, asal duwán salà na di makapid tun ta kamatayan.

<sup>18</sup>Isóddóran ta na di ágpanayun áglumu ka salà tô manubù na inému dán na batà ka Manama, su ágdóppónan sikandin katô Batà ka Manama ébô di sikandin kadattan i Maibuyan.

<sup>19</sup>Isóddóran ta na mga sakup ki katô Manama, asta isóddóran ta na ágpangulu si Maibuyan katô langun manubù na di ágpamaké nit banuwa.

<sup>20</sup>Isóddóran ta na igpamanubù tô Batà ka Manama, asta igpénagpát din áknita ka mánnun ta tô kasóddór ta katô bánnal Manama. Igpasábbad ki tun ta bánnal Manama asta tun ta Batà din na si Jesu-Cristo. Sikandin tô bánnal Manama na ágbággé katô kantayan na ándà ágtamanán.

<sup>21</sup>Purisu mga gabatà, liliyi yu tô mga ánnà bánnal manama.